



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 7

Yangia anidakangma :



Tir Yimiyim



tir_yimiyim



tir yimiyim

TAPAK 7

Iran-i Strait of Hormuz lapoktsü benokaka totzü jenjang timba akümer

Kylian Mbappe El Clasico asayatsü masayatsü mejangja

VOL. XXIII ISSUE NO. 195 (ADOK 195) DIMAPUR RASEMNÜ (WEDNESDAY) RONGCHII (APRIL) 29, 2026

₹ 5.00

District 10 nung Apr 30 nü 'power shutdown' alitsü

Dimapur, April 28, 2026 (TYO): Nagaland nung "Operation Night Guard" - Civil Defence Air Raid/Blackout exercise alidang minute 15 atema power shibangsü ta Department of Power-i metetdaksüogo.

April 30, 2026 nikongdang 6:30 nungi 6:45 tashi District 10-Dimapur, Kohima, Mokochung, Wokha, Zunheboto, Mon, Phek, Tuensang, Peren aser Kiphire

nung power shutdown alitsü ta department-i ashi.

Iba exercise takok ngua agitetsü atema public-i iba mapang tsungda "lights, electrical appliances, inverters aser other sources of illumination" shibangsü mepishir ta department-isa ashi.

April 30, 2026 nikongdang 6:45 ako nung siren ola agütsüba sülen power supply agütsü ta parnokisa shisem.

CSAB 2026 candidates atema sentong agitsü

Dimapur, April 28, 2026 (TYO): Nagaland nung Department of Technical Education-i CSAB 2026 candidates dang seminar-cum-awareness programme nung adentsü metetdaksüogo.

India tesem balala nung NITs, IITs, aser tanga Centrally Funded Technical Institutions (CFTIs) nung Admission indang Counselling sentong nung adentsü metetdaksür ta

Department-i ashi.

Iba sentong ya May 1, 2026 anepdang 11:00 ako nung Directorate of Technical Education, Nagaland, Kohima Conference Hall nung agitsü.

Iba sentong nung CSAB 2026 registration, counselling procedures, aser reservation provisions indang osang tejangja lemsateptsü ta Department-isa ashi.

Special Secretary Dr. Sajjan-i Kohima semdang

Dimapur, April 28, 2026 (TYO): Department of Expenditure, Ministry of Finance nung Special Secretary Dr. Sajjan Singh Yadav, IAS-i tanü agi anogoo ananübuba Nagaland nung amungdang Kohima nung mapatong inyakba tesem aika semdangogo.

Special Assistance to States for Capital Investment (SASCI) scheme kübok High Court, Meriema, Working Women's Hostel, Kigwema aser Kisama Heritage Village nung Main Arena yangluba tesemtem pai semdanga liasü.

Special Secretary Dr. Yadav-isa Kohima War Cemetery semdang aser iba mapang

Finance Commissioner & Commissioner & Secretary to the Chief Minister, Kesonyü Yhome, IAS den ketdangsürtemi pa meina senzü.

April 27, 2026 nikongdang Dr. Yadav-i Hotel Vivor nung dinner and interaction programme nung aden.

Idangji pai küm semer shi jungnüa nung Nagaland tanaben semdangba atema pelaba aser menungraa bilemetba lemsatep.

Paisa Ülikhrei Folk Group ajanga sobaliba shilem agiba atema tenüngsang agütsü aser iba ajanga Arunachal Pradesh nung Deputy Commissioner inyakba bilemetdaksüogo ta ashi.

BJP Mahila Morcha-i Torch March agiogo

Dimapur, April 28, 2026 (TYO): BJP Mahila Morcha, Nagaland-i tetsürtem temeten, akhüm aser kasa shilem agitsü onüktem asoshi ola adoka Dimapur nung Mahila Jan Aakrosh Padyatra (Torch March) agiogo.

Iba sentong ya "Her Seat, Her Right, Her Time" omen nung ajemdaker agi aser iba ajanga ketdangsübaren aser public taküm nung tetsürtemia shilem tuluba agitsü ola adokogo ta Media Cell, BJP Nagaland-i sangdong ka nung ashi.

BJP State Executive Member Sanuo Ngullie-i torch march tenzükja liasü. La iba sentong nung adenba ajanga sentong tali

meraketdaksü aser tesentepertem ajungmesogo ta Media Cell-isa ashi.

Sentong nung BJP Mahila Morcha State President Tsachola Rothrong-i o jembidang women's reservation ya tenla ka masü saka tangutsü tim temeten lir ta ashi.

Laisa Nagaland nung tetsürtemi ola adoktsü, democratic maparen nung shilem agitsü aser lemtet agiba teloktem nung tangutsü tim angutsü atema külemi inyaktsü ayongzuka liasü.

BJP Mahila Morcha nung state lenirtem aser züngsemtemi padyatra nung shilem tajung agia liasü ta Media Cell-isa metetdaksü.

Vidyadhan Scholarship Program atema MoU sign süogo

Dimapur, April 28, 2026 (TYO): Vidyadhan Scholarship Program kübok scholarship agütsütsü atema School Education Department-i Sarojini Damodaran Foundation den Memorandum of Understanding (MoU) ka nung sign sütepogo.

April 28, 2026 nü Nagaland Civil Secretariat, Conference Hall, Kohima nung iba atema sentong ka agia liasü.

"Sarojini Damodaran Foundation-i Nagaland den sendakteper Vidyadhan Scholarship Program mapa tenzükba atema pelar" ta School Education & SCERT Advisor Dr. Kekhrielhoulie Yhome-i ashi.

Iba scholarship ajanga sorkar school tem nung tawa HSLC tatidang nung takok angurtem ajangzüksü. NBSE results adokli iba mapa tenzükba ya mapang tebenjem lir ta Advisor Dr. Yhome-i ashi.

"Sarojini Damodaran Foundation founder SD Shibulal dena iba reju den tesüiba mapang nungi sensaksema aruba ajanga iba mapa tenzük. Iba sentong ya khenyongi balaka lir kechiyong iba ajanga school level nung dang masü saka professional courses densema higher education nunga kaketshirtem yarir" ta pai ashi.

Nagaland ama state ka nung nisung aika yimtsüngtem nung alir aser senotsü agi timtemer. Anungji iba sentong ajanga senotsü agi timtemba kaketshirtemi maongka jenti angutsü ta paisa shisem.

Nagaland nung alirtem asoshi shisaliok ya kanga tongtipang teinyaktsü ka lir aser iba tesentaktep ajanga kaketshirtem asoshi tajung inyaktetsü amanger ta Advisor Dr. Yhome-isa metetdaksü.

"Iba sentong ya Nagaland nung kaketshirtem asoshi shisaliok maongkatem anguba lir. Iba MoU sign asüba ajanga tang aliba sorkar schemes dak alia scholarship programme tenzükba nung yariteptsü" ta School Education & SCERT Commissioner & Secretary, Kevileno Angami-ia ashi.

Shialiok ajanga takümtem melenshitsü nükjidong nung iba mapa ya linük nung state 18-19 shi ka nung inyaker aser tang Nagaland nunga tenzük. Iba ajanga kaketshirtemi zünga aotsü atema teyari talila angutsü ta laisa ashi.

Iba scholarship programme ya telatetba kar nung ajemdaker inyaktsü ta Kevileno-isa shisem.

"Nagaland state sorkari tesentaktep yangluba atema tenüngsang agütsür aser onoki Nagaland nung iba mapa tenzüksüba ya maongka ama züngshir" ta Sarojini Damodaran Foundation nung Principal Consultant Pankaj Tripathi-i ashi.

"Vidyadhan Scholarship Programme ya 1999 küm Kerala nung tenzük aser tang State o Union Territory 22 nung inyaker. Tang tashi nung scholarships 78,000 tema agütsüogo aser iba ajanga kaketshir 15,000 tema ajangzükogo" ta Tripathi-i

metetdaksü.

"Iba mapa nung senotsü teyari dang masü saka mentoring, career counselling, soft skills development, aser internship opportunities dena lir" ta paisa ashi.

"Iba scholarship programme atema shimtetba kaketshirtemi küm 5 nungi 7, Class XI nungi tenzük higher education tashi teyari angur. Maneni kümshia kaketshir batch tasentem anioker aser iba ajanga programme manener aser ulushir" ta Tripathi-isa ashi.

"Iba scholarship ya sponsors nungi tenla aruba ajanga agütsür aser senotsü ajak kaketshirtem dangi indangindanga yoker" ta Sarojini Damodaran Foundation nung Operations Manager Jacob Sukumar-i ashi.

Foundation-i senotsü teyari agütsüba dak alia kaketshirtem asoshi training programmes agir. Iba nung career guidance, motivation, aser soft skills development atema kümshia anogo pezünü residential training agir ta pai ashi.

"Sarojini Damodaran Foundation-isa kaketshirtem zünga aodang additional training programmes ayonga agir. Class XI aser XII kaketshirtem academic choices aser career pathways nung len anir aser higher education kaketshir asoshi employability training, including mock interviews aser skill-building sessions agir" ta Sukumar-isa metetdaksü.

Dmr aser Mkg nung NEPEX atema metetdaksür



Dimapur, April 28, 2026 (TYO): April 30 anepdang 8:00 ako nungi tenzük Nagaland Emergency Preparedness Exercise (NEPEX) agitsü aser nikongdang 6:30 ako nungi operation night guard alitsü.

Iba exercise alidang nübertem maoksatsü ayongzük. Deputy Commissioner & District Disaster Management Authority (DDMA) Dimapur Chairman Dr. Tinojongshi Chang-i metetdaksüogo.

Iba asoshi shimtetba tesem punguji Government Higher Secondary School, Purana Bazar, Hollotoli School, Naharbari, Westside Store, Darogapathar, Indian Oil (IOCL), Kevijau aser PHC Purana Bazar

lir ta pai ashi.

Maneni, Operation Night Guard atema Deputy Commissioner office, Purana Bazar aser East Dimapur Town Council office shimteta lir ta Dr. Tinojongshi-isa metetdaksüogo.

District Disaster Management Authority, Mokochung-ia Nagaland State Disaster Management Authority den yaritepa 8 buba Nagaland Emergency Preparedness Exercise (NEPEX) agitsü.

April 30, 2026 anepdang 8:00 ako nungi tenzük iba exercise alitsü aser iba nung menoknok aser extreme weather disaster jilu aitsü. Mokochung jila nung NEPEX atema shimtetba tesemtemji Government High

School, Dilong, IMDH building, Deputy Commissioner's office aser Mokochung Village nung landslide clearance operation asütsü ta Deputy Commissioner & Chairman, DDMA Ajit Kumar Verma, IAS-i ashi.

Kasa anogo nikongdang 6:30 ako nungi "Operation night guard - Civil Defense Raid/Blackout Exercise" ta ser Mock Exercise ka agitsü ta paisa ashi.

Iba exercise anaprong nung siren activation aser temporary blackout measures adentsü anungji Mokochung jila nung alirtemi maoksatsü aser petsaprong masütsü metetdaksür ta Mokochung DC-isa ashi.

Civil Defense Air Raid/Blackout Exercise mapang public-i inverters aser external lighting dena non-essential lights ajak aseptsü mepishir ta paisa metetdaksüogo.

Justice Kalyan-i NSLSA atema Multi-Utility Vehicles tenzüksü



Justice Kalyan-i NSLSA atema Multi-Utility Vehicles tenzüksüba noksa nung angur.

Dimapur, Rongchii/April 28 (TYO): Gauhati High Court obendanger aser Executive Chairman Nagaland State Legal Services Authority (NSLSA) Justice Kalyan Rai Surana-i NSLSA aser District Legal Services Authorities (DLSAs) balala atema Gauhati High Court, Kohima Bench nung April 28 nü Multi-Utility Vehicles (MUVs) tenzüksüo.

Sentong nung o jembiba mapang Justice Surana-i, nüburtemi legal teyari nüngdakra aser kar pei temeden amshitsü atema tetsükdaksü ajangshia lira legal services mapa matem ta metetang ta ashiba den legal services mapa tanen makai aotsü ta shisem.

Paisa, garitem ya kechi nükjidong atema alizük iba atemaji dang amshitsü nüngdakba lemsatepba den legal services authorities dang item ya jung junga aser khuret angateta anepalutsü ajangshi.

Obendanger yagisa,

nüburtem parnok temeden ameshidaksütsü atema scheme aser service balala indang tangazükba agütsütsü kodang tongtibang iba indang lemsatsep.

Justice Surana-i, state ajunga nung legal awareness sentong balala ayongzüka agiba atema NSLSA nem tenüngsang agütsü. Pai ashiba agi, Nagaland nung item awareness sentong ajanga temelenshi bener arutsüba ya jangrademtsüka lir.

Sentong nung NSLSA Member Secretary Neiko Akami-i lokti pela agizükba o jembiba mapang ashiba agi, multi-utility vehicle tem ya 2025-2026 financial year nung ali, koba Nagaland ajunga nung legal service balala agütsüba akangshitsü nükjidong nung alizükba lir.

Paisa, garitem ya district ajak nem lema agütsütsü ta ashi. Transportation ya koda tongtibang iba indang lemsatepba mapang Akami-i ashiba agi, kinük nung aliba

tesemtem tonga oa legal service balala agütsütsü ya ajak dang tetsükdaksü tulutiba lir.

Pai gari aliba nükjidong tongtibangtibaji obendangerterem aser legal service kübok inyakertem atema lir, shirnok legal teyari agütsütsü atema tesem balalai teti senzüa dang alir, ta ashi. Item garitem yagi kinük nung aliba tesem densema Nagaland nung tesem ajak tonga oa teyari agütsütsü asoshi lenmang lapoktsütsü, ta paisa shisem.

Kasa mapang nung Senior Advocate aser High Court Bar Association tir C.T Jamir-i, state kübok LSA temi inyakim balala benoka inyakba atema tenüngsang agütsü.

Sentong ya Panel Lawyer, Kohima DLSA Asenla Walling lenisüba nung agi. Sentong nung High Court Judge, Justice Pranjal Das, High Court Bar, Kohima bar züngsemtem, panel lawyer aser high court staff temi shilem agia liasü.

Kohima nung mejangjaba tasü mang ka nguteta lir

Dimapur, Rongchii/April 28 (TYO): Forest Colony, Kohima kübok Khuochiezhü nung tanep nisung ka süngtong ka nung aletseta sür aliba ngutetogo, aser iba dak sendakba nung nisungba maitsü ya jangjatsü atema nüburtem dang teyari meshiogo.

Mongolbar anepdang 10:38 ako shi nung police-i phone ajanga nisung ka süngtong ka nung sangzüa aliba osang agizüka liasü. Officer-in-Charge-i anir South Police Station nungi team ka iba tesemi aritepa ao.

Iba tesem tonga aoba sülen ketdangsürtemi mejangjaba (non-local) tasü mang ka ali nungi süklep 15 shi pila süngtong kongsang ka nung aletseta sür

aliba nguteta liasü.

Asüsang ya arishi küm 35 nungi 40 tsüngda asütsü ta bilemer. Pa sentsüh temesüng, tar süklep 5 ser inch 7 shi aser pai jacket temerem ka, T-shirt tanak ka aser shorts tanak ka semer liasü.

Temzüng ozüng kübok tinyaksü maparen ajak tembanga inyakba sülen tasü mang ya South Police Station morgue nung maitsü jangjatsü atema yua lir.

Asüsanger kinunger, adianu aser medemerem dang Officer-in Charge, South Police Station, Kohima @ 6009308089 den tongteprateptsü mepeshia metetdaksüo.

Chumoukedima nung April 30 nü mock drill agütsü

Dimapur, Rongchii/April 28 (TYO): Chumoukedima Deputy Commissioner, Polan John, NCS-i sangdong ka ajanga, lendong balala nungi jenboa alitsü asoshi renema atatsü atema jenjang agiba nung shilem ka ama district nung state-level mock drill ka April 30 nü 9 ako nungi tenzüka agütsü ta metetdaksüo.

Deputy Commissioner-i ashiba agi, jongdak mapang telangzüba agütsüba inyakim tajungba kümdaksütsü aser lendong balala atalokba mapang department aser agency balala tsüngda tangatettep tajungba kümdaksütsü nükjidong nung iba

inyakyim ya benoka inyaker.

Ken o dak sendakba nung Chumoukedima nung alirtem dang drill mapang maoksatsü mepeshia metetdaksüba den, lendong mapang telangzüba agütsütsü asoshi terenemshiba koma ali aji asadangtsü atema inyakim ya benoka inyaker ta ashi.

Maneni district administration-i nüburtem dang teka amteper inyaktsü aser lisopurtem dang süngjema alitsü aser exercise mapang ketdangsürtem aser emergency responder tem nem teyari agütsütsü mepeshia metetdaksüo.

East Dimapur Town Council-i metetdaksür

Dimapur, Rongchii/April 28 (TYO): East Dimapur Town Council-i sangdong ka ajanga, East Dimapur Town Council office nungi temelaba magi-i banner, hoarding, signage mesüra board tem enokba memelatsü ta metetdaksüo.

Kija aser lokti kari danga iba tetuyuba sülen manidaki pei

mulungka nung inyakba ngutetra temzüng ozüng dak ajemdaker aibelena alirtem nem tapet temerenshi agütsütsü, ta kasa sangdong ajanga metetdaksü.

Iba tetuyuba ya osang agütsüba anogo nungi tenzüker benoka inyaksangshitsü, ta metetdaksüo.

Dimapur nung IT hadirtem lemtsüba aser Aadhaar nung züngoksemba sentong tenzükogo



DC Dimapur, Dr. Tinojongshi Chang den tanga ketdangsertem Registration of Births & Deaths kübok IT hadirtem lemtsüba sentong nung tangokba noksa nung angur.

Dimapur, Rongchii/April 28 (TYO): District Economics & Statistics Officer (DESO), Dimapur-i April 28 nü Hotel Saramati, Dimapur nung Registration of Births & Deaths kübok IT hadirtem lemtsüba aser tanur arishi küm 0 nungi 5 tsüngda alirtem Aadhaar nung züngoksemdaksütsü atema sentong tenzüksüba sentong ayongzüka agiogo.

Sentong nung Additional Director, Economics & Statistics aser Joint Chief Registrar of Births & Deaths, Nagaland Neisatuo Puro-i nisung asoba aser asüba indang

koda online ajanga Register asür iba indang metetdaksü. Paisa, digital registration tajangzük aser service tajungba agütsütsü atema iba shilem indang metetdaksü.

Puro-i ashiba agi, village council aser yimtsüng nung ketdangsürtemi teyari magütsüi Registrar kijai nisung asoba aser asüba register asütsü tamakoktsü. Paisa, iba lokti tentetem ya tazüng nung osang agütsürtem lir ta shia parnok dang nisung asoba aser asüba jangjashiba nung teyari agütsütsü mepeshi. Ochimashi inyakim tali küma aoba süoki

ia bilemba indang jembiba mapang pai, osang ajak shitak bendena ayutsü atema kanga junga asadangtsü ayongzük.

Maneni pai asoba aser asüba ya 2023 küm April ita nung online ajanga züngoksema arudar saka asen state tangar memenepi lir ta ashi. Paisa, online registration ya fresh applications kija atema masü saka birth certificate tejentem digitization-a densema lir, ta ashi. Iba dak sendakba nung pai nüburtem dang parnok indang certificate tem digitize asüba nung teyari agütsütsü mepeshi. Puro-i, computers, colour

printers, aser internet dongle tem densema tenüngdakba teyaritem pei mapa shitak inyakba Registrar tem nem agütsür ta ashi.

Sentong nungsa Deputy Commissioner, Dimapur & District Chief Registrar of Births & Deaths Dr. Tinojongshi Chang, NCS-i, birth rate, death rate, aser infant mortality rate amala tongtibang statistics tem ya shitak mangaoka mayuba ajanga aiben meshitak alir ta shia, register asütsü ya koda tongtibang iba indang nüburtem nem tangazükba agütsütsüla, ta ashi. Paisa, Nagaland nung census inyakim taküm tenzüksü lir asünung shitak züngoksema data shitak bendena ayutsüji kanga tongtibang ta ashi.

Maneni sentong nung o jembiba mapang District Education Officer, Dimapur Jevika Kiba-i, IT hadirtem lemtsüba ya rijutem nem digital hadirtem agüja parnok tashi itshidaksüba nung alizüng tasen ka tongtetba lir ta ashi.

Laisa, item hadirtem amshia tesayurtemi nisung asoba aser

asüba züngoksemba inyakim tashi itshidaksütsü, ta ashi.

Kiba-isa, tesayurtem ya kaket shisatsü sayurtem dang masü saka lokti lenirtem, tangar ajungmesortem aser tangari temulung lemteta bilemerem lir ta ashi. Lai tesayurtem dang nisung asoba aser asüba züngoksemtsü koda tongtibang iba indang lokti nem tangazükba agütsütsü mepeshiba den sorkar inyakim aser nüburtemi shilem agiba na tsüngda apu latsür kaka akümtsü ajangshi.

Maneni lai, tanur arishi küm 0 nungi 5 tsüngda alirtem Aadhaar nung züngoksemtsü atema sentong tenzüksüba ya tanurtem ka danga mesentoktsü atema tongtibang jenjang ka agiba lir, ta ashi.

Kiba-isa, sentong ayonger, department, lokti lenirtem, Arogo secretary tem aser tesayurtem dang parnoki tongtibang shilem agiba atema kanga pelaba lemsatepba den Arogo secretary temi record tem bendena ayuba nung teyari agüja registration inyakim nongitba indang lemsatsep.



April 28, 2026 nung New Delhi nung United Nations General Assembly (UNGA) Tir, Annalena Baerbock-i Rajghat semdanga Mahatma Gandhi nem akhüm agütsüdang tangokba noksa nung angur.

Taonung WB, TN, Assam aser Kerala indang exit poll sangdongtsü

New Delhi, Rongchii/April 28 (Agencies): West Bengal, Tamil Nadu, Assam, Kerala aser Union Territory Puducherry nung assembly elections agiba exit poll osang Bodhbar aonung 7:00 ako nung sangdongtsü.

Bodhbarnü West Bengal nung menden 142 atema assembly election tanabuba shilem agia aonung 6:00 ako nung tembangtsü.

Aonung 6:00 ako tashi nung tarensen nung nokdaka alirtem

nembo vote agütsütsü atema temelaba agütsütsü, ta ketdangsertemi metetdaksü.

Bengal nung election shilem mezüngbuba April 23 nü agia liasü. Election metembang tashi exit poll sangdongtsü atema memelatsü, ta Election Commission of India-i sangdonga liasü.

April 29 aonung 7:00 ako meta West Bengal nung exit polls osang sangdongtsü.

Tamil Nadu nunga menden 234 atema April 23 nü election agia liasü aser iba state nunga April 29 aonung 7:00 ako nung exit polls sangdongtsü.

Tang Tamil Nadu nung DMK sorkar lir aser parnok den densema aliba teloktep densemabo menden 158 lir aser AIADMK-i aniba opposition teloktep menden 67 lir.

Tang Assam nung BJP sorkar lir aser parnoki aniba NDA menden 80 lir aser

Congress-i aniba opposition menden 23 lir. Assam nung April 9 nü election agia liasü aser exit polls osangji April 29 aonung 7:00 ako meta sangdongtsü.

Kerala nung April 9 nü election agia liasü aser iba state nunga kasa anogo aser kasa mapang nung exit poll osang sangdongtsü. Tang Kerala nung Left Democratic Front sorkar lir aser tongti opposition ji Congress-i aniba UDF lir.

Puducherry Union Territory nung assembly menden 33 atema April 9 nü election agia liasü, aser iba UT nunga April 29 aonung 7 ako nung exit poll sangdongtsü.

Kerala, Puducherry, West Bengal, Tamil Nadu aser Assam nung exit poll ji April 29 aonung 6:30 ako nungi Zee News TV ajanga 'live' sayutsü. Exit poll osangji Zee News TV indang YouTube channel nunga live repringangtsü.

Nisung tajung ajaki Kejriwal toktsüogo: Kiren Rijiju

New Delhi, April 28 (Agencies): Mongolbarnü Union Parliamentary affairs minister, Kiren Rijiju-i Aam Aadmi Party (AAP) tongti lenir, Arvind Kejriwal aija, 'nisung tajung ajaki Kejriwal toktsüogo' ta metetdaksü.

Anogo ishika tejaklen Raghav Chadha densema AAP MP teneti AAP toktsür BJP nung aden.

Interview ka nung jembidang Rijiju-i, lenirtem party melendaksütsü atema central agencies amshir ta jembiba osangji tiyazü, ta metetdaksü.

"Amokmerenba kecha mali. 'Aam Aadmi' tenüng amer sensakertem dang nungi auyar. Arvind Kejriwal-i ajak azüoker aser pai Aam Aadmi Party ya pa nija meyong party ka kümdaksüogo," ta Rijiju-isa metetdaksü.

"Ka khen, ka khen ta Aam Aadmi Party nungi lenir aikati party toktsür aser BJP mesüra Congress nung adener," ta paisa metetdaksü.

"ED tim mesüi amshiba mali. Iba investigation agency-i parnok mapa inyaker, aser iba atemaji onoki kecha ashitsü

makok. Nisung tajunger ajaki Kejriwal toktsüogo," ta pai ashi. Opposition INDIA teloktepa aija Rijiju-i, iba teloktep nung densema alirtem rongnung telemsa adoka lir, ta metetdaksü.

"INDIA teloktep denteteritem ajak ya 'Tukde-Tukde' meyong. Parnok rongnung shinga meputep. Women's reservation anema nokdaksü atema dang parnok longjem. Iba sülenbo Rahul Gandhi-i Arvind Kejriwal aitsür," ta pai ashi.

"Arvind Kejriwal-i Rahul Gandhi aitsür. Rahul Gandhi-i Mamata aitsür. Tangatetba kasa nung parnok melongjem. Auyatsü aser maongka atema dang parnok longjem," ta pai ashi.

Hokolbarnü Rajya Sabha nung AAP MP teneti party toktsür BJP nung denogo. MP tenetji

Raghav Chadha, Sandeep Pathak, Ashok Mittal, Harbhajan Singh, Rajinder Gupta, Vikramjit Singh Sahney aser Swati Maliwal nunger lir.

Tangbo Rajya Sabha nung BJP MP 113 kümogo.



April 28, 2026 nü Bishkek, Kyrgyzstan nung SCO Defence Minister tem senden alidang India Defence Minister, Rajnath Singh aser Russia Defence Minister, Andrey Belousov na ajurua jembidang tangokba noksa nung angur.

LAND FOR SALE

North : 107 fts
South : 101 fts
East : 106 fts
West : 87 fts
Location : AtIndisen Village
Contact : 8798160994

बैंक ऑफ़ बड़ोदा Bank of Baroda **CHUMUKEDIMA BRANCH**
OKM Building, NH-39, 4 A D Lane 5, Ward 6, Dimapur, Chumukedima, PIN- 797103, Email: chumuk@bankofbaroda.bank.in **ABRIDGED VEHICLE E-AUCTION NOTICE**

Yangi public aser talisa sen apur (tem) aser Guarantor (tem) dang ya sangdonger, Hypothecation/Loan Agreement kübok party balalai tezüngzuktep agiba kübok tashi agüja aliba nung ajemdaker Bank-i tsünglanglen shia aliba Hypothecated Motor Vehicle agiadokogo, aser tsünglanglen shia aliba account/s nungi sentsüh alangzütsü atema gariji "Kong aliar yamaji", "Koma lidir yamaji" aser "Yangji aliba ajak basis nung ayoktsü. Sen apur/tem / Guarantor/tem / Gari /Sentsüh ajak / Reserve Price /e-Auction anogo aser mapang, EMD aser Bid Increase Amount ji tsünglanglen shia lir:-

Sr No.	Name & address of the Borrower	Total Dues (in Lakhs)	Vehicle Make & Model Registration No.	Date & Time of e-Auction	1. Reserve Price 2. Earnest Money Deposit (EMD) 3. Bid Increase Amount	EMD deposit Account No. & IFSC Code Name of the Branch	Inspection Date & Time
1.	DEBASHISH KUMAR BARMAN, DIMAPUR	3.56	Make: NISSAN MOTORS Model: MAGNITE TURBO Regd. No.: NL07CB2044	04.06.2026 Time: 12 pm to 4 pm	1. Rs. 2,75,000/- 2. Rs. 27,500/- 3. Rs. 10,000/-	A/c No.: 60660015181219 IFSC: BARBOCHUMUK	02.06.2026 Time: 10 am to 4 pm
2.	DEBASHISH KUMAR BARMAN, DIMAPUR	3.56	Make: MAHINDRA & MAHINDRA Model: BOLERO B6 Regd. No.: NL07CB9102	04.06.2026 Time: 12 pm to 4 pm	1. Rs. 2,25,000/- 2. Rs. 22,500/- 3. Rs. 10,000/-	A/c No.: 60660015181219 IFSC: BARBOCHUMUK	02.06.2026 Time: 10 am to 4 pm
3.	CHANTHUNGO Y EZUNG, DIMAPUR	4.08	Make: MARURI SUZUKI Model: CELERIO ZXI Regd. No.: NL07CB5425	04.06.2026 Time: 12 pm to 4 pm	1. Rs. 1,75,000/- 2. Rs. 17,500/- 3. Rs. 10,000/-	A/c No.: 60660015181219 IFSC: BARBOCHUMUK	02.06.2026 Time: 10 am to 4 pm

Iba sale dak sendakba nung telatetbitem metetsü atema website link <https://baanknet.com> nung repringang. Bid asütsü tejangrartemi Mobile No.: 7975737624 ajanga Branch tekolak den tongteprateptsü akok.

* Bank telatetba nung aliba ama GST alitsü.
Date: 28.04.2026, Place: Chumukedima **Authorised Officer, Bank of Baroda**

Petrol/diesel totzü peria rizünga lir: Sujata Sharma

New Delhi, Rongchii/April 28 (Agencies): Linük nung diesel aser petrol totzü peria rizünga lir, ta Centre sorkari metetdaksü.

Osangbenertem den jembidang Ministry of petroleum & natural gas nung joint secretary, Sujata Sharma-i, Andhra Pradesh tesem kar nung diesel totzü agi anünga ajanga nüburtem kanga aoksatepa liasü; ibaji bentetsü atema Centre sorkari state sorkar den tongtepratepogo, ta metetdaksü.

"Arunachal Pradesh tesem kar nung HSD (diesel) ayokba shilem 30-33 agi teimba aküm, aser ibaji ajanga ROs (retail outlets) kar nung totzü agi anünga liasü. Onoki iba tensa asandangdar aser kobi melii retail outlets ajak nung totzü angutsü," ta Sharma-i metetdaksü.

Sorkari totzü peria lir, ta shiaka olulu nung ajemdaker nisungtemi totzü kanga alitepba ajanga totzü atem aser April 26-27 anogotem nung Andhra Pradesh nung filling stations 400 dak tali shibanga liasü.

Sharma-isa, "Linük tesem ajaklen diesel aser petrol totzü peria lir. Asenoki tangalen nungi petrol aser diesel 'import' asütsü menüngdak," ta metetdaksü.

"Ni sensotem dang olulu mamangtsü mepishir," ta laisa metetdaksü.

Ano tanga osang ka nung, Union Minister Hardeep Singh Puri-i Uttarakhand Chief Minister Pushkar Singh Dhami ajurua pa dang state nung Char Dham Yatra mapang nung totzü peria agütsütsü, ta metetdaksü.

Tesülen Puri-i X ajanga, "Künati energy atema jembioigo aser methitemi Uttarakhand dangi energy supply yoktsü atema inyakdar," ta metetdaksü.

बैंक ऑफ़ बड़ोदा Bank of Baroda **PURANA BAZAR BRANCH**
N H- 39, Kohima Road, Purana Bazar, Dimapur, Nagaland- 797112, Email: vjdipu@bankofbaroda.bank.in **ABRIDGED VEHICLE E-AUCTION NOTICE**

Yangi public aser talisa sen apur (tem) aser Guarantor (tem) dang ya sangdonger, Hypothecation/Loan Agreement kübok party balalai tezüngzuktep agiba kübok tashi agüja aliba nung ajemdaker Bank-i tsünglanglen shia aliba Hypothecated Motor Vehicle agiadokogo, aser tsünglanglen shia aliba account/s nungi sentsüh alangzütsü atema gariji "Kong aliar yamaji", "Koma lidir yamaji" aser "Yangji aliba ajak basis nung ayoktsü. Sen apur/tem / Guarantor/tem / Gari /Sentsüh ajak / Reserve Price /e-Auction anogo aser mapang, EMD aser Bid Increase Amount ji tsünglanglen shia lir:-

Sr No.	Name & address of the Borrower	Total Dues (in Lakhs)	Vehicle Make & Model Registration No.	Date & Time of e-Auction	1. Reserve Price 2. Earnest Money Deposit (EMD) 3. Bid Increase Amount	EMD deposit Account No. & IFSC Code Name of the Branch	Inspection Date & Time
1.	RAMCHIANG NEWMEI, DIMAPUR	4.53	Make: MARUTI SUZUKI Model: IGNIS DELTA Regd. No.: NL07CB7553	04.06.2026 Time: 12 pm to 4 pm	1. Rs. 1,50,000/- 2. Rs. 15,000/- 3. Rs. 10,000/-	A/c No.: 787450015181219 IFSC: BARBOVDJIPU	02.06.2026 Time: 10 am to 4 pm

Iba sale dak sendakba nung telatetbitem metetsü atema website link <https://baanknet.com> nung repringang. Bid asütsü tejangrartemi Mobile No.: 8732008701 ajanga Branch tekolak den tongteprateptsü akok.

* Bank telatetba nung aliba ama GST alitsü.
Date: 28.04.2026, Place: Dimapur **Authorised Officer, Bank of Baroda**



TIR YIMYIM YIMOBILEM (EDITRIAL)

DIMAPUR WEDNESDAY, APRIL (RONGCHII) 29, 2026

Mapa inyakerkem benjong

Tanü asüng purateta amungba Hornbill benjong ama dak alaka asenok sobaliba benjongmung ajak alu mapa ka temer ano ka metenzükdang, anogo ishika anisüngzüka kidang munga pelatepa amungba benjongmungtem lir, anungji mapa meinyaker atemabo kecha benjonga maka. Ibaji mapaa maka aser chiyongtsüa maka ta asüba den kasa dang lir. Aji oda, taküm küm asoshia anogo ana lirbo Moatsü benjong amung tenzüktsü. Atangji, akhi mapang ama tanü asüngbo asenok aikati tsük lu mayimer, anungji moatsü amungtsüjia mapet amai akümer, kechiyong Moatsü benjong ya aluyimertemi pei pei lu nung tsük dena yutsür külen amunger. Ajisüaka, tang asenok tsük lu mayimba agi mapa meinyaker ta ashitsübjaja masü, kechiyong tanü putu nungbo akhi ama tekong lu nung tsük lu ayimba dang nungibo tanga mapa inyakba nungang tajangzük tajungba aser tuluba angur. Ibayongji, asenok aika government aser private mapa nung ita sen chia inyaker, ano nisung aika business tapu balala inyaka kibong mesür aser ano aluyimertema tsük lusa mesüaka alu tapu balala yima anisüngzüka alir, anungji mapa dang melen ashi, mapa meinyak anen ta masü saka karbo tangsa teinyakba inyaker. Ibayongji, tsürabur mapang monga aruba sobaliba benjongtem ya putu mapang aser mapa dak apet tajungba kuma yanglushir amongtsübjaja kanga nungdaker. Ano, asenok sobaliba benjongtem dak aketba tajung kaji, benjong ajak ya Tsüngrem tashi aser teyari bilemteta amungba benjongtem lir, anungji sobaliba benjong amungba agi Tsüngrem nungi piladaktsür masü saka anasabai arudaktsür. Iba tangatetba nung asenoki kodang Moatsü mongdir, asenok asoshi ibai Tsüngrem dang temoatsü meshia sarasadema amungba benjong, Prayer Festival, ka kumadoktsü. Aiben asenoki Moatsü sentong nung iba shilembaji tongtibangtiba ser nung amadoker aser sobaliba aser chiyongtsü len dang temulung agütsür. Ajisüaka, Moatsü benjong ya Tsüngrem dang alu junga arotsü atema temoatsü meshia sarasadema amungba benjong süra, atangji benjong asünungji chiajema pelateptsü aser tsüngsanga tsüngsangtsü, saka Moatsü sentong nung lokti ajak külemi nokdaker Tsüngrem dang temoatsü meshia sarasadem kabo agitsüla. Aji oda, kodang asenoki Tsüngrem dang külemi longjemer temoatsü meshia sarasademdir, asenoki Tsüngremji temoatsü ajak madak kibur ta jangjatsür. Tsüngremi aji aginer aser temenen moiyingi aji maginer. Iba tangatetba nung kodang asenoki Moatsü aser Tsüngremmung among tenzükdir, idangjibo item benjongtemji arogo nung benjong akümtsü, anungji tenla kidanga, koba anogo nung südir sang, anogo kabo agiteta Tenüngsang agütsüba aser Temoatsü meshiba sarasademba sentong kabo agitsü. Tanübo asenoki Moatsü aser Tsüngremmung ama sobaliba benjongmungtem amongba ya asenoki inyakba nungi nashi ak tepseta amunger-a masü aser ano külen sarasadema amunger-a masü saka yimkong lungjemer lokti Moatsü sentong ka renemtsü aser iba sentong nung tongti tesemdanger mesüra tongti tejaoker kar mejeteta jaoker, Tsüngrem masü itemji tushia amungtsü aser temoatsüa Tsüngrem dang masü parnok dangji meshitsü. Aji oda, peii inyakba nungi sarutepa Moatsü aser Tsüngremmung benjong amunger masü saka sentong nung jaoka alir tongti tesemdanger mesüra tongti tejaokertemi tenla agütsütsü teimla nung asenoki sobaliba benjong sentong tulu renemer amonger. Ano, karibo tongti tesemdanger dang benjong amongtsüba sen jelia meshia ataba otsüa lir. Asenokji lia lia yamaji aseni inyakba nungibo benjonga memongtet kümogo. Aji oda, Moatsü aser Tsüngremmung benjong amongtsüba otsüjibo yutsür, asenoka karbo Christmas benjong agütsütsü nangzüka yur pi dang meshimetsüa jajaba otsüa lir. Tetezüji, asenoki mapabo meinyakner saka benjongbo mongner aser tenlabo magütsüner saka benjongbo ayongzükner. Ibaji asenok dak alar kolok dena aliba ajanga lir. Alaribo teti kibur dak dang imlar, anungji agütsütsübo mebilemer. Ajisüaka, kodang asenoki asen sobaliba benjongtem ajak ya mapa inyaker amungba benjongtema ta angatetdir, asenokia mapa inyaker benjong amongtsü jangratsü. Atangji, mapa agi benjong kümer amongtsübjaja jangratemtsüka lir.

OLEMSABANG

NLTP ACT 1989 AJANGA NAGA KHRISTANTEM TELOK ANALEMSAR OTIA RARATEPPER

~ K. LIMA LONGKÜMER

(Yashi adok nungi...)

Asenok ajaki inyaktsüba asen tsürapor-i alu tuluka yimzükka mekazükka yutsü ajisaka teinyakkerbo shinga mali. Teinyaktsü puri kecha meinyak mupung nung kuli kecha maka asateppa kazütepper. (Sayutsünger kaküt tabu 2:11 kü teka agi inyakba mapa ajak, aser ni aji inyaktsü bilemba indang reprang aser ajiang, ajak amajok aser mopung anema merangba dang liasü aser anüng kübok tajungzük kecha mali asü. Tsürapor mangdang amajok kümdaktsüba agi Temeshi laishiba ajangaka asenok dang asenoki kecha meinyakba atema tesasa ou agi asenok danga ashir.

Mezüng Nagaland nung yi anema mapa inyak tenzükba Nagaland nungi District pungu nungi tama ola adoka mulungteppa tenzük, aser action akia inyakbabo Konyak nung tama liasü. Onok CYE nung tenzükba mapang acüji ABAM aser lennirtemi ayongba nung shelem akia Emergency meeting Impur nung akiba lir, iba maparen nung yi ajanga meimchir dangi aser Aor aser Naga nung daküm jengang raksatsübjaja yi aser Drugs ajanga lanur daküm aeka raksatsüdaki ta tangatetba agütsürji asen lennir Dr. Toshi Echa ajanga rasaa ashi. Iba sülen jogo mapa agi inyaktsü tenzük dang Mokokchung Town lanur aser CYE nungeri yi aeka poa bendenba Mokokchung Police Point nung Mokokchung nung aliba aser temeket yim nungi yimtsü yimpo, Arogotem nungi lennirtem aser temulung aeka atenshia yi tapoba ajak raksa yi agi ayong imma indok, aser tesentepper ajaki teka mekanga yi-ji mim, nisung asoshi tamajungtiba aser nisung tepsetba yi ta ataktema Mokokchung Town anokshia olatulu adoka sarasadem akir senshi, iba sülenbo jogo Aor yimtsüngshia aser town telala nung aliba CYE nungertemi yi mitta potenna indok. Ozü Ungma CYE (onokia) iba nungji shelem akia Sewak gate nung Rum (yi) ayokker aser Local yi yanglurtem onoki potena indok, iba sülen Kohima-Zunheboto aser Tuensang nungi aruba junction state Highway nung 10th Assam Rifle duty alidak nokdaker cari taru tao süsübonger aser tetsüng agi khu penner jajar temulung malem nisung khu ajak mitta Hapta ka ammansangwa maka memejang inyak, iba sülen ano ozü yimtsüng nunga yi ayokker ki mitta aodang aeka poten ajak raksa indok. Tia maka mezüng sewak gate nung yi yanglua ayokker (Local yi) aser Rum aboba ajanga Local nisung aser temeyoktep nisung tzümar dena (tayokertem) parnoki onok anema Imsüsür dangi khün ou aben anungji imsüsür Salangi onok CYE office bearer ajak aja onoki metsübaue oa aden, Imsüsür-i onok dang ou aeka asüngdanga onok arühtsü saka onoki langzübjaja Naga nung tashidak nungi aneptsü aser sensak tia nungi kümzüktsü Naga nung ajak nokdaker ta langzü yamaji shiaka Imsüsür-i nenoki thangar kibong mesüba chiyongtsü raksaa indoktsür nenok dang senche alitsü ta ou lepdang agütsü ajisaka onoki tasüitta onoki senche magütsütsü ta nokdak, aser poisa jang kata magütsü salang nungi aluadok. Lia arudang yimtsüngi yi penner maittsü tangatetter Imsüsür-i ozüng tesashi meso.

Arok meyong mapa ta angatetbayong ozü CYE nung temibo akokba tashi Ita ka songtema tashe ajak agi imyakogo, shidakba onokbo tanidakker dang aser voluntary service inyakkertem dang saka mungdang aser Arogo nung inyakkertemi mapa-a meinyaker nüpur nemma tashe magütsür kecha sentong (plan) meyanglur, yimshi (formality) asadenner, ashe temulung nung itta inyak acübo Pastor temi yi achimmer Deacon nung meshimla, Pastor yi abenner Pastor nungi anentsütsü melena ano Reverend-ang kümdaktsür, Pastor-i sen aohyar Pastor tenüklen mekümdangpur mapa nungi anentsütsü melena ano Reverend Kümdaktsür temenen mapa jakdakka inyakker yimjak nung atemshia jempiaka mapa nungi manen or expelled macür, parnok pastor association ozüng aser Reverend association ozüngbo kanga sashia ammeter ajisaka NLTP ACT nungbo mapa maka, mapa matenba tamangji tasü, Arogo ana mulungtepper Pastor Reverend transfer acütsü inyaktepper liasüba Reverend kümmer küm asem (3) ita tera agi mapensabayong transfer maparen cancelled sütsür ta Board of Reverend-i inyakbajia angur. Nisung shia bi Personal/Individual ajak aibelenba lir iba nungji nia tensemme lir saka yimden aser Arogo Mungdang nung amtakka inyakker alangzükker aser tah akia inyakker aibelendangbo tenük amua alibaji itemji. Ochi, temeshi aser nüchi nübu macü Eden tsüki anüktsü Adam aser Eva yutsü nung tena asah aibeledaktsüba temenen Ber (Snake) du Dimapur nung arua küm aeka pa sünütsü sütarh.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Algeria nung Protestant Tenla kitem ajak shibangdaksür



2017 küm Algeria nung aliba Tizi-Ouzou yimti nung ketdangsertemi Full Gospel Arogo Tenla ki shibangtsüdang tangokba noksa nung angur. Algeria nung Protestant Arogo tulutibaji iba Arogo ya liasü.

April 28, 2026: Algeria nung Protestant Arogo Tenla kitem ajak amai shibangdaksüdar, aser ibaji ajanga Khristan meyirjang aikati pei kidang dang tekülem sentong agitsüsa kümogo.

Iba linük nung sorkar ketdangsertemi Islam yimsü mamangertem anema ano tenokdangba tesashiba benoker.

2017 küm nung tenzüka Algeria tesem aika nung Tenla ki shibangdakja liasü, aser iba ya tamangba yimsü temeden anema lir, ta European Centre for Law and Justice (ECLJ)-i metetdaksü.

Algeria linük temzüng ajangabo ajak nem tamangba yimsü temeden agütsür, ajisüaka tezüluba o atangji naji khenyongi balala.

2006 küm mezüng ketdangsertemi Protestant Tenla ki 58 shibangdakja liasü, aser item Arogotem rongnung Protestant Church of Algeria (EPA) den affiliate süa aliba Arogo aika densema lir. Yaküm January ita tashi nungbo tanünga evangelical Arogotem indang Tenla ki-a ajak shibangdaksü.

Joko tamangertemi pei kidang dang mesüra moapu nung tekülem sentong agitsüsa akümer. Ano tamanger karibo house churches tenzükgogo aser karibo kanga tezülen adenshir olive süngdong akhüm nung tekülem sentong agir.

EPA nung lenir kati, "Onoki akokba tashi tamangertem longjemer tekülem agitsü meranger. Longjemer külemtsüji kanga tongtibang," ta ashi.

Algeria linük temzüng ajangabo yimsü balala amanger ajak nem külemtsü temeden agüja lir, ajisüaka aiben Khristantem nembo iba temelaba magütsür.

2006 küm agizükba ozüng tasen ka kübok, yimsü dak sendakba sentong ajakji ketdangsertemi melaba building nung ang agitsü tetuyuba agüja liasü, iba sülen 2012 küm agizükba ozüng tasen ka ajanga yimsü dak sendakba associations ajak dang register

asütsü tuyua liasü.

"Atangji nungbo, tekülem ki tasen lapoktsü atema sorkar ketdangsertemi Khristantem nem temelaba magütsür," ta kasa report nung shia lir.

Sorkar ketdangsertem dang nungi temelaba magii lokti adenshia tekülem agira ibaji ozüng alema inyakba ama züngshir.

Temelaba magii lokti adenshia tekülem agiba atema pastor tem aser tamangertem aika anema ken o benoker aser mapang shia police-i tamangertem mita aoer.

Algeria nung Islam yimsü ilatsübaji ozüng alema inyakba ama benshir mesüra Muslim nung ka tanga yimsü dangi meyipdaksütsü merangra temerenshi agütsür.

Ketdangsertemi item ozüng amshia social media nung Khristan yimsü indang lemsatepba, yimsü dak sendakba kakettem lemsüba aser yimjak nung Khristan yimsü indang jembiba anema inyaker.

Item tenokdangba aliba agi Khristantemi yimjak nung yimsü dak sendakba temaitsütem mamshir mesüra pei yimsü indang sadoksadoka mejembiteter.

Iba linük nung tamangertem anema tenokdangba aika liaka Khristan nütsüng arener; talisa evangelical Protestant nütsüng kanga renlokogo.

Tang Algeria nung Khristan nütsüng 156,000 lir aser ibaji linük nütsüng shilem 0.3 shi lir, ta kasa report ajanga metetdaksü.

Talisa Kabylia region nung Khristan nütsüng kanga renlokogo.

Iba linük nung talisa Islam yimsü toktsür Khristan yimsü agizükertemi reshikangshi tuluba ajangshir. Islam yimsü toktsür Khristan yimsü agizükertemi ketdangsertemi dang masü saka pei kin mesüra kinüngertemia sendoker aser reshikangshir.

North Africa nung aliba linük aika nung sorkartemi yimsü temeden agüja lir, ajisüaka tenokdangba balala benoker.

Tunisia linük temzüng nunga yimsü temeden agüja lir, ajisüaka nisung kar yimsü meyipdaksütsü merangbaji ozüng alema lir. Morocco linük nunga Khristantem inyaksangshi balala pusemer ajisüaka Muslim nung Khristan yimsü dangi meyipdaksübabo ozüng alema lir. Ketdangsertemi Khristantem dang masü saka tanga yimsü amanger teloktema mita repranger.

Ajisüaka North Africa nung Khristantem atema linük tamajungtibaji Algeria kümogo, kechiyong tawa iba linük nung Protestant Tenla kitem shibangtsüba dang masü saka register masüba associations anema-a inyaker.

Tawa Pope-i Algeria linük semdangba sülen ang alima linüktemi iba linük nung yimsü temeden junga magütsüba tali jangjar.

"Algeria nung Khristantem anema inyakba kanga bulua kümogo. Temzüng aser administrative inyakyim melenshia Khristantem anema inyaker," ta report nung shia lir.

Alima tesem aika nung Khristan nütsüng kanga ajema akümer

April 28, 2026: Tang alima tesem ajaklen Arogo nung lenirtemi timtem ajangshitsüsa kuli aika lir, aser item kuli rongnung nung nisungtemi tesem melenshia aliba, reshikangshi aser jila/yimtitemi oa litepba densema lir, ta study tasen ka ajanga metetdaksü.

Gordon - Conwell Theological Seminary indang Center for Study of Global Christianity-i 'Status of Global Christianity 2026' report ya sangdonga liasü.

Alima tesem ajaklen Khristan yimsü maneni ainer, ajisüaka Islam yimsü kanga tekeraba ainer, ta kasa report ajanga metetdaksü.

Lifeway Research-i ashiba agi, tang küm shia Khristan nütsüng shilem 0.95 ainer saka Islam nütsüngbo küm shia shilem 1.57 ainer.

Tang alima nung Muslim nung nütsüng billion 2 dak tali

ANOGO ABEN TSÜNGREM DEN

Tongpang rara mesüra tazüokba ?

Kechiaser Kibubai shiba dang meimer pa merenshir aser Pai agizükba techir ajak dak azüker. Ibri 12:6.

Khristan shia jangratemtsü masüba mapatem atalokba ajaki tanelaren tongpang rara ama bilemer. Kodang timtem ka atalokdir, idangjisa iba timtem agientsü aikati Tsüngrem dang asüngdang. Parnok timtem tebilemstüji Satan mesüra tanelaren kechi prok aji arur (Gal. 6:7) ta agizükdang nungibo Satani asenok amaker ta agizübaji tali tamarenba lir.

Temeim Tebui arütsübaji Satani merenshir ta aibilena angatetsü akok. Nai tanelaren tesayur ka ama tanur dang mesayura, Tsüngremi parnok temenen nung tsükdaksütsü akok. Na tenzüng nung ochi meshira na melenshitsü asoshi iba nungi adokbaji nai agidaktsütsü akok. Ne mulung masüba temulung süa kümdakjang ta sarasademtsübaji tamashi asütsü. Nai temulung agütsütsü aser ne taküm nung nüngdak temelenshi adokdaksütsü asoshi Tsüngremi na azüoker. Ne tebilemstütem Tsüngremi azüokba den sendaktepa melira koda lendong. Tsüngrem azüokba Satan mapa aser tanelaren tongpang rara ka ama agizükra Tsüngremer tazüokbai kodanga meyaritettsü. Nai ajuruba timtem ajakji Tsüngremer tazüokba masü, saka Tsüngremi na azüoker ta Laishibai sayur.

Tsüngremi arütsüba nai mangatetra Tsüngremi ne sarasadem melangzür aser Satan nungi kümzüksü makoker ta nai tenüng asentsü akok. Saka nai temenen menabayong timtem ajurur ta Tsüngremi ne nem tekümdangtsü agütsür. Ne taküm nung timtem mapang ajurur asü? Ibaji Tsüngrem tazüokba asü? Tsüngrem, shiba temeim nung tabensa lir, Pai tatem nung tajung agütsütsü Pa mulung nung alinung Pai na metongshitsür.

kümogo aser 2075 küm tashi nungbo Muslim nung nütsüng billion 3.4 ajungtsü ta asadangteter.

Akhidang nungi Khristan nütsüng aika aliba tesemtem nung Khristan nütsüng kanga ajema akümer. Mapang ka nungbo Khristan nütsüng teimba aliba continent ji Europe liasü, ajisüaka küm shia Europe nung Khristan nütsüng shilem 0.41 agi tajemba akümer. Tangbo Europe nung Khristan nütsüng million 553 dang kümogo.

Tang North America nung Khristan nütsüng million 275 lir, aser küm shia Khristan nütsüng shilem 0.16 agi tajemba akümer.

Khristan yimsü tenzüka tesem- Middle East nunga Khristan nütsüng kanga ajema akümer. 1900 küm Middle East nung nütsüng shilem 12.7 bo Khristantem liasü saka 1970 küm tashi nungbo shilem 6.1

dang liasü aser tangbo Khristan nütsüngji shilem 4.2 dang lir. Middle East nunga küm shia Khristan nütsüng shilem 0.07 agi tajemba akümtsü.

Yimtsüngtem nungi jila/yimtitemi oa litepba ajanga Khrista osangtajung proktsü atema tayongzükba tulu ajurur. Nisung million ka dak tali aliba yimtitemi kanga aika kümogo. 1900 küm nütsüng million 1 dak tema aliba yimti 20 dang liasü saka tangbo nütsüng million 1 dak tali aliba yimti 670 kümogo. Tangbo alima nung tongtibang yimtitemi shilem 60 nungbo Khristantem ya minority kümogo.

Missionary mapa inyakba aser oshi balala nung Laishiba meyipzükba wadang nung takok tulu nguogo, ajisüaka tang tashi alima nung Khrista osangtajung agi mayimjemba nütsüngji shilem 27.7 (nütsüng billion 2.3) lir.

AO OSHI ANGAZÜKDAK:

TANÜ ANGAZÜKTSÜBA OJANG



Yamai

(adj) iba ya mesüka (like this)

* Yamai teti asenok yaritepa alitsüla.

Yamala

(adj) iba amaji (like that)

* Yamala nisungi kodanga mapa tajung meinyaktsü.

OLONG PAITEP # 7488

Grid for crossword puzzle #7488 with numbers 1-16.

TIPILEN

- 2. Auonung chiyongtsü asenba
5. Mangyimba mapang
7. O tamendakdak
8. Peidak malangba
10. Juli
12. Sen ayudak
14. Tenük agi ajitet
15. Tamajung aküm
16. Apuso

LANGTSÜNGLEN

- 1. Lenmang
2. Aor kidong ka tenüng
3. Tenarong maten
4. A ___ g
6. Mopung apodoka
9. Tongtipang tagitsü
10. Menungra bilem
11. Aiür
13. S ___ k
14. T ___ r

OLONG PAITEP # 7487 TELANGZÜBA

TIPILEN :

- 1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem, 15. Tambu,
16. Khuret, 17. Sang.

LANGTSÜNGLEN :

- 1. Yimti, 2. Amen, 4. Shiner,
5. Alaka, 6. Satan, 9. Putet,
10. Tembar, 11. Tatok, 12. Amang,
14. Jala.



MEPUTEP O

Alokba : O tenzüker tajung asen Ao oshi nung meputep o aser tenung kar shian gma ?

Tenzüker : Alokba, nenok nüchi masü amai dang alir ashi asen Ao oshi nung meputep o aser nüngja aika lir saka ni kar shidi, Tajung Tamajung, Aor Tsümar, Talang Tatsü, Tekolak Tetsüng, Taku Tanang, Tzü Mi, Tepok Teperem, Tanak Temesüng, Tachichi Tapelen, Anüng Ali, Ammang Tesangwa, Apu Chiok, Mejang Sak, Tetsür Tebur, Taküm Tasü, Yimjung o Nüngsen o, Tamanger limapur, aser Kodak Molumi, ano !!!!

Alokba : Ata liang tenzüker ! Süra naa Kodak o Molumi na nungji kobala nung atentsü ??????

Tenzüker : ümm ümm O Alokba !!!!

~ Lilir : I. Kilang Ajem, Indisen, Dimapur,

Tipra Motha MDC 24-i tezüngzüktep agiogo

Agartala, April 28, 2026

(Agencies): Tipra Motha Party (TMP) nungi District Council (MDCs) züngsem 24-i Hombarnü Khumulwng nung tezüngzüktep agiogo.

Parnoki Tripura Tribal Areas Autonomous District Council (TTAADC) ketdangsüa aotsü.

Iba sentong nung Tipra Motha tanishisang Pradyot Kishore Debbarmen aser party president B.K. Hrangkhwal nati anir Minister aser MLA tem aden.

Züngsem 28-i akümba TTAADC elections nung Bharatiya Janata Party (BJP)-ia menden pezü nung takok ngua liasü saka parnoki tezüngzüktep agiba sentong nung maden.

TTAADC kübok mapa 120 atema recruitment drive nung tim masüba liasü ta tai tonglokja BJP züngsemtemi iba sentong mokdangtsü metetdakja liasü.

"State aser linük asoshi lanurtem, healthcare, education aser employment maongkatem kanga tongtipang lir. Asenoki inyakyim melenshitsüla aser temelenshi terara agidangbo tayongzükbatem mekoktettsü" ta Tipra Motha tanishisang Debbarmen-i ashi.

"Tripura tasen ka aser India tasen ka yanger. Asenoki youth, health, education aser opportunities nung temulung magütsüra loktiliba timtemtsü" ta pai ashi.

Paisa ketdangsübaren shilem ulushitsü nüngdakba ashi. "Planning aser policy maparen nung taoba sorkar mapa inyakterem, judiciary züngsemtem, kaketshirtem aser art and culture nung shilem agirtem dendaktsütsüla" ta pai ashi.

Tribal council areas tejakleni aoba ya state ajunga renlokba den sendaktepa lir. Anungji Centre-i TTAADC asoshi temulung agütsütsü ayongzüker ta Debbarmen-isa metetdaktsü.

"TTAADC medeni Tripura renloka maotsü. Elections temogo anungji tang asenoki nübertem renlokdaaktsütsüba nung temulung agütsütsüla" ta paisa ashi.

Tipra Motha züngsemtemi Chabimura tourism site atsünga agi

Honibarnü Tipra Motha Party züngsem noklang aikati Gomati district kübok Chabimura tourism facility atsünga agiogo. Iba tesem ya Tripura Tribal

Areas Autonomous District Council telongtet kübok lir ta Tipra Motha züngsemtemi ashir.

Honibarnü Tipra Motha züngsemtemi management office indang main gate shibangtsü. Tang aliba management committee züngsemtem shinga maitdaktsütsü saka tourists menokdangter ta parnoki ashi.

"2018 nungi BJP lennirtem adenba committee kati dang Chabimura madak ketdangsüa aru. Iba tesem ya TTAADC telongtet kübok lir aser ADC nung ruling party ama onoki ketdangsütsüla" ta Tipra Motha züngsem kati ashi.

Chabimura ya Gomati River anasa lir aser iba tesem ya rock carvings atema tetshir. Iba tesem nung Putu 15 buba aser 16 buba tashi nungi rock carvings lir aser ano sandstone cliffs nung Goddess Durga mesüka noksa tulu ka yanglua lir.

Tipra Motha züngsemtemi tesem atsünga agiba ajanga tourism facility maparen nung meinprong liasü ta ketdangsurtemi ashi. Ajisüaka management committee mesüra BJP lennirtem nungibo tang tashi osang kecha mali.

Manipur nung telungpurtem apu; prangpong-injang angu

Imphal, April 28, 2026

(Agencies): Manipur kübok district balala nung security forces ajanga joint operations inyakdang telungpur asem apu aser prangpong-injang den tapoktsü aika ngutetogo.

April 19 aser April 25 tashi operations agiba nung Indian Army aser Assam Rifles-i Manipur Police den yaritepa shilem agia liasü.

Kakching, Chandel, aser Tengenoupal district tem nung intelligence-based missions inyaka liasü.

April 19 nü Assam Rifles aser Kakching Commando unit külem telok kati Kakching Lamkhai Laipham Loknung nung mita aodang PREPAK (Pro) züngsem ka apu.

Ano, April 20 nü Tengenoupal district nung security forces-i PREPAK (Pro) aser People's Liberation Army (PLA) nungi züngsem kaka apu.

Maneni, April 21 nü Tengenoupal district kübok T Bongmol nung aremtem mita aodang rifle ka, carbine ka, radio sets ana aser Improvised

Explosive Devices (IEDs) pezü nguteta liasü.

April 23 nü Assam Rifles aser Chandel Police külemi Khumkot village anasa arem mita aodang prangpong aser tapoktsü aika nguteta liasü. Iba tesem nung 'pomp' guns pezü, bombs 7, grenades with detonator 3, aser radio sets 5 ngutet.

Prangpong-injangtem den telungpurajak Manipur Police ket nung agütsüogo aser maneni bushisüngdang südar ta ketdangsurtemi ashi.

AMC election nung ZPM-i takok tulu nguogo

Aizawl, April 28, 2026

(Agencies): Aizawl Municipal Corporation (AMC) elections nung Zoram People's Movement (ZPM) ajanga takok tulu nguogo. AMC nung menden ajak agi 19 nungi 17 nung parnoki takok angu.

April 27, 2026 nü Aizawl Deputy Commissioner indang office nung votes azüngba sülen Mizoram State Election Commission-i results metetdaktsü.

2021 elections nung

opposition Mizo National Front (MNF)-i menden 11 nguteta liasü saka taküm election nungbo parnoki ward ka nung dang takok angu. Külen, Indian National Congress-ia menden ka nung dang takok angu aser Bharatiya Janata Party (BJP)-ibo menden 11 nung toktepaka ka nung danga takok mengutet.

ZPM, MNF, aser Congress-i ward 19 prong nung toktepa liasü. Talisa tetsürtem asoshi lezmzüksüba menden trok prongla nungi ZPM candidate

temi dang takok nguteta liasü.

AMC ya Mizoram Municipalities Act, 2007 kübok 2010 küm amenoka liasü. AMC kübok ward 19 lir aser 2010 nung mezüngbuba election nung Congress-i takok angu aser iba sülen 2015 o 2021 elections nungbo MNF-i dang takok ngua aru.

April 21, 2026 nü AMC election agia liasü aser vote enoktsür nisung lakh 2.39 shi ka nungi 62.77% ajanga shilem agia liasü.

GOVERNMENT OF NAGALAND DIRECTORATE OF TECHNICAL EDUCATION NAGALAND : KOHIMA INFORMATION

Dated, Kohima, the 28th April, 2026

NO.DTE/CSAB.NEUT/1/2025/43 CSAB 2026 Candidates are informed to participate in the seminar-cum-awareness programme on Counselling for Admission to NITs, IIITs, and other Centrally Funded Technical Institutions (CFTIs) across India. The program is scheduled to be held on 1st May 2026 at 11:00 a.m in the Conference Hall of the Directorate of Technical Education, Nagaland, Kohima.

This initiative aims to provide detailed information to students, parents and stakeholders regarding CSAB 2026 registration, counselling procedures, and reservation provisions, with the objective of encouraging greater participation from students of the North Eastern region.

Sd- (Er. Vipulhouhangu) Director.

Russia-i Odesa amak; nisung 11 yirutsü

Kyiv, Rongchii/April 28 (Agencies): Ukraine nunger ketdangsürtemi ashiba agi, Russia nunger indang drone temi Odesa yimti amak aser tanur ana densema nisung 11 yirutsüba den nisung aliba ki aser tongtibang infrastructure tem raksatsüogo, ta ashi.

Odesa Governor Oleh Kiper-i ashiba agi, Russia-i district asem makogo aser iba mapang nisung aliba ki, gari aser hotel ka, warehouse tem aser funicular railway densema civilian facility tem dak kongshiogo. Tzüküm nung ki aika nung kijibatem raksa liasü.

Ano Zaporizhzhia tesem nung nisung ka tepsetogo, ta Governor Ivan Fedorov-i ashi.

"T z ü k c h i r t e m i Zaporizhzhia tesem amakba sülen arishi küm 59 tain tebur ka süogo," ta Fedorov-i Telegram nung zülutsü.

Kasa mapang nung Ukraine-ia drone amshia amakba mapang Zaporizhzhia

nuclear power plant nung inyaker ka tepsetogo. Iba plant ya Russia nunger sepaitemi azüoka tang shibanger lir.

"Ukraine indang Armed Forces drone kati Zaporizhzhia Nuclear Power Plant nung transport department amakba sülen gari anir ka tepsetogo," ta Russia-i toktsüba plant manager temi sangdong ka ajanga metetdaksü.

Regional governor Fedorov-i ashiba agi, Russia nunger sepaitemi anogo ka nung tesem 45, 629 ben amak aser nisung aliba ki aser tanga infrastructure tem raksaba osang 50 tashi agizükogo.

Russia nunger ketdangsürtemi ashiba agi, Ukraine nunger drone temi Belgorod aritsü nung tesemtem amak aser iba mapang nisung ka tepsetba den tetsür pezü yiruja liasü. Iba tesem nung kia ka aser garitem raksa liasü.

Yimjung atema sensaksem bangdaker aliba mapang tang

linük anapronglai kati ka maktepdar. Donald Trump-i Deobarnü ashiba agi, pai tir Vladimir Putin aser Volodymyr Zelenskyy den sensaksem tajung kaogo.

"Onoki Russia aser Ukraine na atema inyaktepdar aser takok angutsü imlar," ta Trump-i Fox News dang ashi.

"Ni pa den aser tir Zelenskyy den sensaksem tajung kaogo," ta paisa shisem.

"Tir Putin aser tir Zelenskyy na tesempatep ya tamagitsü. Tesempatep ya majung. Langka bentettsü merangba mapang tesempatep ya majung, saka takok angutsü," ta pai ashi.

Zelenskyy-i ashiba agi, pai Baku semdangba mapang Azerbaijan den security & energy cooperation dak sendakba nung tenangzüktepba ka yangluogo. Paisa, Russia den tarutsü nung iba tesem nung sensak asemtsü atema Kyiv-i benoka sensaksemogo, ta shisem.

Nigeria nung telungpurtemi nisung 29 tepset

Abuja, Rongchii/April 28 (Agencies): Nigeria nung Adamawa State kübok Guyaku yimtsüung nung telungpurtemi nisung 29 tepsetogo aser ki-ojen aika raksatsüogo, ta ketdangsürtemi ashi.

"Guyaku nung alirtem atema kü mulung raksar," ta Adamawa indang Governor Ahmadu Umaru Fintiri-i Hombarnü asür kinungertem semdangba mapang ashi.

"Tanü ni asen adianutem azütokshia bener aoba tesem nung nokdaka lir. Iba ya tasümaiter inyakyim ka aser memerenshibo metoktsütsü," ta pai ashi.

Fintiri-isa, telungpurtem anema jenjang agiba mapang pa indang administration-i military aser mitkar teloktem maneni nongita yaritsü, ta shisem.

Iba tesem nung ISIL (ISIS) telok den sendaktepa aliba

teloki iba tesem amakba ya Telegram messaging app ajanga nangzükogo, ta Reuters aser Associated Press news agencies sangdong ajanga metetdaksü.

Nigeria nung ISIL-i teyari agütsüba tongtibang telok ana lir, saka telok anarongnung kobai iba yimtsüung amak ibajibo mejangja, ta AP-i ashi.

North-central Nigeria nung ozüung alema inyaksangshirtemi orphanage ka maka tanur 23 pur aoba anogo Guyaku ya makogo. Tanur 23 rongnung 15 bo kümzükogo, ta sorkari ashiba den tanungba tanur ti meyipa anir arutsü atema meita aoba sentong benoker inyakdar, ta shisem.

Tanurtem pur aoba ya telok kati danga nangzüka mali. Linük kübok iba tesem nung nisung pur aoba ken o tali küma odar.

Tanurtem ya arishi kwi tain

iba indang osang tejanja memetet, ajisüaka "pupil" indang ojang amshiba tetezü kindergarten mesüra primary school nung azüngertem asütsü ta bilemer, kechiyong Nigeria nung item dang ya "pupil" ta tetsür.

United States tir Donald Trump aser tanga US conservative temi Nigeria nung Khrista dak amangertem kümzüka meyetetba atema Nigeria aitsüogo. Linük nung Boko Haram densema telungpurtemi nüburtem nem kanga timtem agüja arudar.

Kasa mapang nung Nigeria sorkari ashiba agi, parnoki ISIL aser al-Qaeda den sendaktepa aliba teloktem nungi nüburtem kümzüka toktsüner aser Muslim nunger aser tetsü-tebou tamangba yimsü dak amangertem densema tamangba yimsü balala dak amanger ajak maka arudar.

MULUNGNEN O




Onoki teti meima aliba ojala asür **LIKOKSANGLA JAMIR** (UNGMA) ajungbena 24th April 2026 anogo iba lima nungi pila aoba mapang onok mangyim tejashi tia nung alidang kija, kibong, kiyonger, Arogo, kinunger, lokti balala ana aser talang nung alir shirnokisa aria bilemja rongsen, nübu, shisatsü aser sarasadem ajanga yaritepogo, nenok ajak dang kanga pelaba lemsateper. Tsüngremi nenok kija aser kibongtem maneni moajangma ta onok sarasadem.

Temeim Chirnur, Semchir, Puiner aser Kinungertem

OFFICE OF THE LONGKUMER KIDONG MONGSENYIMTI B.P.O Mongsenyimti, P.O. Chuchuyimlang-798614 KONANG TETUSHI AGÜTSÜR

Kongro Tiatula Ao, Wb. Obangyanger Longkumer aser Wt. Merennukla Jamir jala-i NBSE ajanga agiba HSLC 2026 takok angur rongnung tematiba jenjang Top-20 ngütetba asoshi Longkumer Kidong Mongsenyimti Mendenti temulung nung mesemi kümrem pelar aser tetushi agütsür. Asen tulusang Tsüngremi tarutsü nubur teyimla asoshi ne taküm tali takokba aser temoatsü nung aniangma.



Sd/- (L. Lima Longkumer) Tazüung

Sd/- (Nungsangwati Longkumer) Secretary

Office of the Watsü Mungdang H.Q: Mokokchung - 798601: Nagaland

WATSÜ MUNG DANG AJANGA SANGDONGER

Asen Aor Aotsür subosulemstsü ya kanga meraketa metsünga reta aser akümtsüba asen tetsü tebou nungi suboa aru aser item ya koda aser shirnoki itemji subotsü jangja jangja arla shitak lateta lir. Anungji Aor Aotsür ajaki pei subotsü bentet benteta subotsüla. Iba den külemi kin kidong subosulemstsü tependang shitak amshia subotsü asoshi metetdaksür. Shirnoki asen Aor Aotsür subosulemstsü mezüngmeshia mesenmetua amshia subodir pa/la dang Watsü Mungdang ajanga tasüngdangba alitsü ta sangdonger.

Sd/- Wt. Tianaro Jamir Tir

Sd/- Wt. T. Narola Longchar Tongti Zülur

Iran-i Strait of Hormuz lapoktsü benokaka totzü jenjang timba akümer

Doha, Rongchii/April 28 (Agencies): Iran-i Strait of Hormuz nokdanga aliba lapoktsü melena United States den nuclear atema sensaksem atsülangtsü benoker liaka totzü jenjang maneni timba küma odar.

International benchmark Brent crude ya Mongolbarnü shilem asem agi timba kümogo. Tehran-i alima ajungai totzü belener aoba tongtibang lenmang ya lapoktsü asoshi benokaka

shishilembartemi temulung malemer.

Brent ya 07:30 GMT tashi nung barrel nung USD 111.49 liasü, koba taoba hopta mongolbarnü dang nungi shilem 13 agi timba lir.

Iran Foreign Minister Abbas Araghchi-i iba strait lapoktsü atema interlocutor Pakistan dang shidangba sülen tang totzü nung jenjang ya tali kümogo.

Iran-i iba lenmang lapoktsü atema benokba dak

sendakba nung US-i yimjak nung kecha telangzüba agüja mali.

Iran-i shishilembadag amshiba rong amokmerenba atema taoba ita ana tsüngda iba strait nung rongtem senzusenpong tajemba kümogo aser iba ajanga linük aika nung totzü aser natural gas supply dak kongshiogo.

Deobarnü iba strait ajanga rong ti süia liasü, koba Honibarnübo 19 liasü,

ta maritime intelligence platform Windward-i metetdaksü.

US aser Israel nati February 28 nü Iran mamak tsüngda iba strait ajanga anogoshia rong 129 süia liasü, ta United Nations Trade and Development (UNCTAD) data ajanga sayuogo.

Iba tzü lenmang shibanga ayuba aser regional energy infrastructure tem raksaba ajanga alima nung totzü production anogo nung 14.5

barrel agi tajemba kümogo, ta Goldman Sachs-i asatetogo.

Shipping aser logistics expert temi ashiba agi, Iran aser US nati rara anentsü atema telemtetba agiaka totzü shibelenba akhi ama tenzükshitsü asoshi ita jungnüa agitsü, kechiyong totzü aser gas load masü

aika lir, infrastructure tema raksar lir aser Iran nungeri tzüyim nung mine tem toktsür aliba merektettsü asoshi mapang agitsü.

Santner melena Keshav Maharaj Mumbai Indians nung denogo



Keshav Maharaj

Rongchii/April 28, 2026 (Agencies): All-rounder Mitchell Santner tapur yirur IPL 2026 season masayatetsüsa akümba ajanga Mumbai Indians (MI) pur tetsükdaktsü tulu adokogo.

April 23 nü Chennai Super Kings (CSK) den MI pur asayaba mapang Santner ya yirua liasü. Over 17buba nung ball ka apuba mapang Santner tapu yirua liasü.

IPL 2025 mega-auction nung Santner ya MI puri sen crore 2 agi alizüka liasü. Pa ya sen kasa agi IPL 2026 atema alizük. Kasa mapang nung Keshav Maharaj ya IPL 2024 nung

Lucknow Super Giants net bowler ama aden saka iba season Rajasthan Royals (RR) puri alizük. Pa RR atema asaya ana asaya liasü.

"Mumbai Indians (MI)-i Mitchell Santner melena South Africa nung spinner Keshav Maharaj alizükogo, shiba tapu tabelen yiruba ajanga TATA Indian Premier League (IPL) 2026 nung tanungba asaya nung masayatetsüsa kumogo. MI pur Chennai Super Kings den asayaba mapang boundary anasa ball ka aputsü merandang Santner yirua liasü. Left-arm spinner tejen Maharaj, ya New Zealand den T20I

asayamung nung asayaogo. Pa IPL nunga Rajasthan Royals nungi 2024 kum anaben asayaogo," ta IPL sangdong ka ajanga metetdaktsü.

Concussion substitute ama Mitchell Santner melena Shardul Thakur shimba ajanga mepetmesü adok. Critics temi ashiba agi, Santner yiruba ya concussion masü saka tapu yiruba dak sendaka liasü. Iba ajanga substitute dak sendakba nung ken o ashishitep tenzüka liasü. MI coach Mahela Jayawardene-i, ball aputsü merangba mapang Santner tekolak tsüka liasü, aser iba ajanga concussion substitute ka melentsüsa aküm, ta ashi.

Keshav Maharaj ya Mumbai Indians nung sen lakh 75 agi denogo. Pa India tongogo aser pa April 29 nü Sunrisers Hyderabad den asayatsü akok.

Keshav Maharaj-i tang tashi nung T20 218 asayar lir. Pai wicket 191 agir lir asre run-a 817 yanglur lir. Pa T20I nunga 54 ben asayar lir. Maharaj-i South Africa tenung nungi asayaba mapang wicket 55 agir lir aser run 107 yangluogo. Maharaj lenisüba nung SA pur New Zealand den T20 asayamung asaya liasü.

Mumbai Indians (MI) puri taküm IPL nung asaya 7 nung ana dang koka lir aser parnok points table nung tang tekububa nung lir.

Thomas & Uber Cup: India tetsür team-i China mekoki tsükogo

Rongchii/April 28, 2026 (Agencies): Horsens, Denmark nung Hombar aonung Thomas & Uber Cup Group A asaya tatemangbuba nung defending champions 05 agi makokba sülen India tetsürtem iba asayamung nungi tsükogo.

Quarterfinal nung asayatsü atema iba asaya akoktsü nungdaka asaya tenzüka sülen India team-i takok tashi meranga asaya saka mekoktet.

PV Sindhu-i anir India tsürtem asaya aser la mezüngbuba asaya world No. 2 Wang Zhi Yi den asayaa liasü. Decider asaya mapang talangba ka Sindhu-i aziüka asaya aser mapang ka nungbo la 18-12 agi tejakdang liasü. Ajsüüka Wang-i kanga junga telangzüba agüja point tenet atonga angu aser asaya ya 21-16, 19-21, 21-19 agi koka liasü.

Iba sülen India tsür kija asayartemia takok angutsü maongka liasü saka mongutet. Isharani Baruah-i mezüngbuba

game nung Olympic champion Chen Yufei nongshia asaya saka 20-22, 13-21 agi tamakok angu.

Kija asaya nungsa Devika Sihag-i Xu Wen Jing den asayaba mapang mezüngbuba game bo akok, saka 21-19, 17-21, 10-21 agi mekoki liasü.

Tarep asaya nung India tsür Tanisha Crasto aser Kavipriya Selvam nati mezüngbuba game nungbo Luo Xu Min aser Zhang Shu Xian na akok, saka iba sülen China nung tarep yagi tajungba asayateta 10-21, 21-12, 21-19 agi asaya koka liasü.

Tarep asaya tanabuba nung Priya Konjengbam aser Shruti Mishra na asaya, saka tenati Liu Sheng Shu aser Tan Ning na straight games nung makok. India team-i mezüngbuba asaya nung Denmark team 2-3 agi makok, saka tanabuba asaya nungbo Ukraine 5-0 agi koka liasü. Ajsüüka China team makokba sülen parnok asayamung nungi tuguogo.

FIFA World Cup senpet ajungkettsütsü FIFA sentong lir

Rongchii/April 28, 2026 (Agencies): World Cup 2026 nung team tem atema senpet taliba agütsütsü FIFA-i sentong yangludat. Iba asayamung ya United States, Canada, aser Mexico nung asayatsü.

Osang ajanga ashiba agi, asayamung akokba senpet aser asayamung nung shilem agiba taah naprongla ajungkettsütsü akok. Iba dak sendakba nung FIFA Council senden ka nung telemtetba agitsü imlar. Iba jenjang agiba ajanga iba tetoktepba commercial tsütsü takok tajung anguba sayur. Takümba team 48 asayatsü alinung senotsü timba aazüktsü imlar.

Kasa mapang nung fan temia parnok tebilemtsü lemsatepba arudar. Fan tem aikati World Cup asaya repringtsü atema kanga tasak akümer ama bilemer. Senzüsenpong, ticket sen aser tanga tintokbatem tasakba kuma odar.

Senotsü timba agütsüba ajanga team tem ajanzüktsü akok, saka iba asayamung nung shilem agitsü atema fan tem timtemtsü akok.

FIFA-i otsütsüsa taküm iba asayamung atema senpet ajak senteper USD million 727 shi agütsütsü. Team tem ajak nem minimum payment agütsütsü aser asayamung akokba team

nem senpet tulu agütsütsü. Asayamung ajanga sen USD billion 11 dak tema aazüktsü imlaba mapang FIFA-i senpet tem ajungkettsütsü asadangdar, ta The Athletic sangdong ka ajanga metetdaktsü.

Team tali asayadaktsüba ajanga World Cup terenlok nung shilem tulu agiogo. Team timba asayaba tetezü asaya timba asütsü aser broadcasting aser sponsorship nungi aazükba-a timba akümtsü. FIFA-i iba sen yagi alima ajanga nung football terenlok nung teyari agütsütsü ta bilemer.

Ajsüüka fan tem atemabo tetsükdaktsü adoker. Asaya repringtsü atema taah timba kumogo. Senzüsenpong taah aser talisa New York amala yimitem nungbo taah kanga tasak lir. Osang ajanga ashiba agi, stadiums-i train nung tatsüka mener aoba taah-a dena USD 100 dak tema asütsü. Asaya tulutem atema ticket jenjang kanga tasak kumogo. Final atema ticket yokshibatem kanga tasak kumogo.

Toba mapang World Cup tem nungbo fan tem nem angati senzüsenpong dena agüja aruogo, aser iba ajanga parnok senzüsenpongtsü tayongba kumdaktsü. Tangbo nüburttem aikati item tajanzük ya maka ama bilemer.

Kylian Mbappe El Clasico asayatsü masayatsü mejangja

Rongchii/April 28, 2026 (Agencies): France aser Real Madrid forward Kylian Mbappe, tebi yiruba sülen May 10 nü La Liga nung Barcelona den El Clásico asayatsü aliba asayatetsü masayatetsü mejangja.

Real Madrid-i official sangdong ka ajanga, Hokolbarnü La Liga nung Real Betis den goal 1-1 agütsür tembangba asaya nung pa yiruba indang metetdakja liasü.

Official sangdong ajanga ashiba agi, Mbappe tetsüng tabelen nung semitendinosus muscle nung timtim aliba putetogo aser Deobarnü tendangba sülen pa yiruba ya jangjaogo.

Club-i Mbappe ya koba mapang tashi ka nung taneptsü angutsü iba indang osang tejangja magütsü, kechiyong pa ano temang metendanzük lir. Pa koba tashika yirua ali aji jangjatsü atema anogo ishika tsüngda maneni tetendangba balala agitsü aser iba sülen rehab atema sentong yanglutsü.

Season nung kanga dang tongtibang mapang ka nung pa yiruba ya Real Madrid asoshi takoksa lir, aser pa meyipa arur training agitsü atema telemtetba



Kylian Mbappe

magi tsüngda temang asadangtsü renema lir.

Madrid pur La Liga nung tanabuba jenjang nung lir. Parnoki Barcelona point 11 agi memenepi lir aser parnok May 3 nü Espanyol den asayatsü, aser iba sülen Barcelona den asayatsü lir.

Real Madrid-i ashiba agi, Mbappe ya tetsü nung timtem tila ka adokba dang lir, saka tetendangba balala agiba sülen pa yirur aliba ngutetogo.

Mbappe masayaba mapang

Madrid pur Espanyol mekoki Barcelona puri Honibarnü Osasuna kokra Hansi Flick-i aniba team yagi league kokatoktsü.

Mbappe taküm aiben yirua arudar aser iba ajanga United States, Canada aser Mexico nung FIFA World Cup asayatsü lia France asoshi tebilemtsü ka kumogo.

Mbappe shibai 2018 kum World Cup kokogo, pa temekok nung timtem adokba sülen ita ana tashi masayai liasü.

BILEMDANGANG

"Mapa tila ka nentaka inyakdang
mapa tuluba ka inyakteter alir"